



PERSEVERA

Un página di kurashámentu i guía spiritual pa miembronan di Scouting Antiano



Sèptèmber 2012

Edishon 20 Aña 2

SUPERSTISHON

Bo tin miedu di pushi pretu? Di e number 13? Di un spil ku ta kai kibra? Bo ta kere ku bo ta pèrtenesé na un grupo superior elegí speshal di Dios?Esaki i hopi otro mas ta superstishonnan kèns di mentenan ku ta primintí bo i nan no ta kuadra ku e plan di salbashon universal di Dios ku ta trata di **AMOR**.



Superstishon ta un di e armanan predilekto di satanas pasobra e ta uni dos forsanan poderoso, esta idolatria i miedu. E ta un kreensia straño di nos fe religioso i kontrali na rason ku ta krea un fe eksagerá i ta duna un balorisashon ekksesivo na un kos òf un práktika. Ehèmpel ta tur e sektanan, práktikanan esoteriko, adivinanza, magia, horoskop, brueria etc. Tin hopi, den iglesia mes rònt mundu, ku pa motibu di superstishon ta duna un importansha ekksesivo na nan ritonan i selebrashon nan personal pero ta deskuidá e yamada di iglesia pa partisipá den Eukaristia dominikal, solemnidatnan di iglesia i deboshon pa santunan. Superstishon ta krea un ambiente di karga emoshonal ekksesivo kaminda miedu ta bin kondishoná bo fidelidat na Dios. E superstishon ta yega na un grado máksimo ora bo ta kere ku si bo bandoná bo grupito, òf bo sekta diabel ta bai ku bo. Señor ta Dios di amor, no di terror, e ta saka hende sinsero for di nan eror i ta salba nan. Ta p'esei kaminda miedu ta dominá, idolatria i superstishon ta goberná. Un kristian no ta konosé miedu, ni superstishon, ni suerte, sino solamente **dibino providensia** i ta bai risibí kurpa di Señor ku mesun deboshon kualkier kaminda na mundu serka kualkier pastor na mundu, den kualkier iglesia di mundu. No tin diferensha p'e pasobra e no ta superstisioso. Segun katesismo di Iglesia katóliko, 2111, superstishon ta un desviashon di e sentimentunan religioso i su práktikanan. E por afektá e kulto ku nos ta duna e berdadero Dios, komo por ehèmpel, ora ta duna un importansia "mágiko" na sierto práktikanan legítimo i nesario considerando solamente su signonan eksterior, material i bandonando e disposishon interior ku nan ta eksigí.

(cf Mt 23,16-22) Ehèmpel di esaki ta bisti rosario sin meditá misterionan pasobra bo ta kere ku e ta protehábo mágikamente; bai

risibí eukaristia serka sierto pastor so òf serka sierto iglesia so pasobra bo ta kere ku bo ta mas serka Dios ku nanHendenan ku ta obra asina ta superstisioso pasobra nan ta duna un importansia eksagerá na nan rito i selebrashon nan pero ta deskuidá e esensia di nan, esta **amor**. Mayoria di hende ku ta pertenesé na iglesianan separá ta permanesé den nan pasobra e superstishon ta asina grandi ku ounke hopi biaha nan ta deskubrí e engaño, nan no kier sali for di e grupo pa motibu di **miedu**.

Superstishon ta duna práktikanan legítimo un balor eróneo komo por ehèmpel usa un skapulario sin ta fiel na Santa Bírgen Maria pensando ku e pida tela ei so lo salbabo. E ta un produkto di ignoransha i di un bashí spiritual. Pafó di iglesia, e ta klaramente visibel den e sikologia sektario kaminda promé kos ku nan ta hinka fuertemente den bo kabes ta ku tur lo ke bo a siña den iglesia no ta sirbi pa nada, ku bo no ta kristian, ku bo no tin fe, ku solamente nan por dunabo fe..... Nan ta lagabo sunú, sunú sin ningun apoyo interior. Den e momento ei, si bo ta débil, un bashí spiritual tremendo ta poderá di bo i pa motibu di ignoransha i superstishon bo ta pone bo bida en adelante den e man di esnan ku a katekisá bo i di su sekta, bo a bira un katibu di nan interes personal. Esta un kaida grandi!!

No confundí tampoko tradishon ku superstishon. Si bo ta duna tradishon nan un poder mágiko bo ta hasi di nan superstishon. Ruman, katesismo ta siña nos ku superstishon ta un pika kontra e Promé Mandamentu pasobra e ta atribuí podernan ku ta pertenesé na Dios na otro kosnan. No hasi idolatria di nada; e ta ridíkulo pa mira un persona ku ta kere firmemente ku su éksito pa e aña benidero ta dependé di kuantu mas klapchi òf pagara e ta sende aña nobo.

Señor a bini pa habri wowo di siegunan i pa kibra kadena di sklabitut pa tur hende di tur rasa, pueblo, lenga i nashon, por lo tantu, komportá bo mes komo un hende liber sin superstishon nan i sin miedunan i duna e respèt i balor debido na tur selebrashon i solemnidatnan ku iglesia ta ofresé sin atribuí na otro kosnan òf otro selebrashonnan e podernan superior ku solamente ta pertenesé na Dios.



Nuestros fracasos nunca son un obstáculo para que Dios quiera o pueda usarnos. De hecho, nuestra debilidad es una gran oportunidad para que Él muestre su gloria. Cuando nos sometemos a la autoridad del Señor, podemos tener su victoria en todo.